

PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATUK DR. EWON EBIN
[RANAU]

TARIKH : 8 MAC 2016 (SELASA)

SOALAN :

Datuk Dr. Ewon Ebin [Ranau] minta PERDANA MENTERI menyatakan:-

- (a) bilakah kajian semula Perjanjian Malaysia 1963 (yang terakhir) dijalankan serta keputusannya; dan
- (b) sama ada penurunan kuasa kepada negeri-negeri Borneo, Sabah dan Sarawak kelak akan mengambil kira hak-hak istimewa negeri Sabah dan Sarawak seperti mana yang termaktub dalam Perjanjian Malaysia 1963.

JAWAPAN: YB PUAN HAJAH NANCY SHUKRI
MENTERI DI JABATAN PERDANA MENTERI

Tuan Yang di-Pertua,

1. Perjanjian Malaysia dan dokumen-dokumen yang berkaitan dengan pembentukan Malaysia seperti Akta Malaysia 1963 [*Akta 26/1963*], *Report of the Inter-Governmental Committee (IGC Report)* dan Laporan Suruhanjaya Cobbold tidak mempunyai peruntukan berhubung dengan kehendak untuk membuat kajian semula terhadap Perjanjian Malaysia secara keseluruhannya.
2. Walau bagaimanapun, terdapat klausa-klausa di dalam IGC Report yang telah menjadi sebahagian daripada Perjanjian Malaysia 1963 yang membolehkan kajian semula.
3. YAB Perdana Menteri semasa merasmikan pelancaran Bulan Kebangsaan dan Kempen Jalur Gemilang 2015 di Kuching pada bulan Ogos 2015 yang lalu telah mengumumkan untuk lebih banyak kuasa pentadbiran membabitkan jabatan dan agensi persekutuan bakal diserahkan kepada Kerajaan Negeri Sabah dan Sarawak dalam usaha merangsangkan pembangunan di kedua-dua negeri ini. Seterusnya, perincian utama *empowerment* kepada Kerajaan Negeri Sabah dan Sarawak tersebut telah diumumkan oleh Perdana Menteri pada 16 September 2015 yang melibatkan penurunan kuasa secara pentadbiran dan berperingkat kepada Kerajaan Negeri Sabah dan Sarawak.

4. Pelaksanaan *empowerment* secara pentadbiran dan berperingkat tersebut adalah berdasarkan ketetapan-ketetapan yang diperuntukkan di dalam Perlembagaan Persekutuan dan undang-undang Negara. *Empowerment* secara pentadbiran ini akan tertumpu kepada fungsi-fungsi operasi dan pentadbiran tanpa melibatkan implikasi perundangan yang memerlukan pindaan Perlembagaan Persekutuan atau mana-mana undang-undang Negara yang berkaitan, termasuklah perkara-perkara yang telah disenaraikan dalam Senarai Persekutuan, Negeri dan Bersama.

5. Dalam hal ini, pemberian *empowerment* secara pentadbiran sedang diteliti dengan terperinci oleh Jawatankuasa Bersama Mengkaji *Empowerment* Secara Pentadbiran Kepada Kerajaan Negeri Sabah dan Sarawak (JBMES). Jawatankuasa Bersama ini ditubuhkan oleh Kerajaan bagi mengkaji perkara yang boleh dan akan diberi *empowerment* secara pentadbiran kepada Kerajaan Negeri Sabah dan Sarawak.

Sekian, terima kasih.